



ル 5
3150
5





門 儿 5  
號 3150  
卷 5

黔南識略卷五

貴州巡撫長白愛必達撰

普定縣

普定縣附郭元初置普定萬戶尋陞為普定府大德  
七年改為普定路明洪武十五年置普定衛屬四川  
都司尋陞軍民指揮使司正統三年改屬貴州都司  
國朝康熙十一年改衛設縣裁定南所及西堡甯谷二  
土司入之設知縣一教諭一訓導一典史一其境東  
至安平縣界五十里西至鎮甯州界四十里南至歸  
化通判界一百二十里北至大定府平遠州界五十



里東南至本府界五十里西南至鎮甯州界四十里  
東北至鎮甯州界五十里西北至本府界四十里廣  
九十里袤一百九十里山川已見府志許纘曾滇行  
紀程謂昔嘗議立省會於此因稱土輕重不及貴陽  
故舍此而從彼也風俗習儉尚儒民於力田之外皆  
自食其力其能畜牛馬販蜀鹽者爲駝鹽戶其止供  
客雇及爲人負債者曰腳戶黔滇楚蜀之貨日接於  
道故商賈多聚焉書院先廢燬後經守令捐建肄業  
者眾所屬田畝奠安中興二里俱有溪河可資蓄洩  
永豐江靖及定南甯穀五枝次之田有三等科糧田

爲上秋糧田爲中屯糧田爲下現在成熟田四萬七  
千七百九十四畝有奇額徵米六千七百八十石有  
奇徵銀七百九兩乾隆四十二年以前差徵人寸逃  
亡奉文在於田畝攤徵共徵正銀八百三十四兩有  
奇額徵正米每年撥支提標兵糧三千三百石有奇  
由縣支給八個月由府支給四個月遇閏府縣分支  
餘米三千二百石有奇於青黃不接之際糶銀解歸  
糧道撥充威甯等處兵餉額徵正銀撥入次年春季  
驛費不敷銀兩赴司找領常平貯穀四萬九千六百  
石有奇官莊穀三十一石有奇照依夏收變價解繳



司庫社倉穀六十三石有奇義倉穀二千一百六十石有奇漢莊苗寨共三百五十有九通計二萬九千一百五十有九戶無土司管轄嘉慶間曾設立土守備一員土千總五員今存土千總二員學額文武皆十二名場市十三各有定期樹多雜木無銅鉛礦廠徵牙帖銀九兩苗有狝家青苗花苗獐猪四種涵濡禮教漸習華風舊衛管五十軍屯改縣後分爲四里曰永豐曰江靖曰奠安曰忠興其土著皆漢人定南里所轄皆熟苗雜髮通漢語廢甯谷土司地分五枝曰上下五苑枝曰丁當枝曰桐運枝曰白石巖枝曰

阿樹隴枝向係生苗今皆順軌設十五塘大道五僻徑十驛曰普利額馬五十匹草料銀日給五分站夫一百名工食日給四分渡口一近於城北隅設普濟堂收養孤貧由提軍守令自行捐銀交商生息以備支給餘並詳府志

### 鎮甯州

鎮甯州在府治西六十五里省城西南二百七十里唐宋俱羅甸國地元置鎮甯州明洪武二十三年添置安莊衛並隸貴州都司

國朝康熙十一年衛裁州仍其舊其境東至安順府屬



龍潭寨界三十里西至郎岱同知屬麻園寨界三十里南至永甯州屬望水亭界三十里北至普定縣屬腰鋪界三十里東南至普定縣江龍場界三十五里西南至本府水西莊界三十里東北至貴陽府貴筑縣穿心堡界二百二十里西北至大定府黔西州翁卡界一百二十里山川險阻翼帶南陲亦爲要地城周五里八分有奇甃以石門四乾隆五十三年重建東坡山在城東三里逶迤盤鬱高三十里亘十餘里相連有筆架山青龍山在城東南三里下有嘉樂池對峙者爲白虎山與白崖山起伏聯絡自水西至普

定歡喜嶺老虎關馬場龍井等處蜿蜒百里至此而止下有豐泉慈母山在城西三里俗名背兒巖螺山在城西三里下有河環翠山在城北一里火烘坡在城東南五十里舊州治也地多瘴癘相傳用火器驚之則散又城北百餘里有九十九隴周百餘里兩水界其左右內藏九十九隴道通一線四面奇峯插漢當時羅鬼弄兵於此雙明洞在城南四里一名紫雲洞又曰太極洞洞口東西相通長十餘丈舊路由洞之左旁有潭潭之上別穿一洞橫石如橋潭水出其下雖晴時亦起細漚如疏雨循橋而進始知滴瀝者



皆石乳也中有大士羅漢像今大路改由洞而游  
屐亦稀矣巢雲洞在城北三里石臺寬廣有水繞其  
下烏泥江卽都泥江在城南百里流入廣西田州白  
水河在城西南三十里源出山中懸巖飛瀑自高注  
下三壑相承直落數十仞湍激若雷潭中迴薄作雲  
氣湧起者丈餘上有觀瀑亭下流入甯谷河黑洞河  
發源城東之黑洞穿城西流入白水河公具河在十  
二營司公具寨下阿破河在十二營司阿破寨下楊  
吉河在城西南十五里菜子河石溪在城南四十里  
俱入白水河合於甯谷達盤江海子在城北舊係糧

田明時成巨浸廣二十里冬夏不涸賀家溪在城東  
源出石岡貫城中土人云每春水如潮至者三歲則  
豐稔宴樂池在城南玉亭山下荻蘆池在城北六十  
里周八里旣濟泉在城東北其地極熱此水獨涼清  
泉在城西三里中產異蟹紫赤色極鮮妍田畝肥瘠  
相半現在成熟田四萬一千一百七十一畝徵米一  
千四百二十石有奇除支兵米廩餼及輓運郎岱關  
嶺兵糈外餘米糶價申解道庫徵銀一千九百一十  
四兩三錢有奇遵例撥入次年驛費不敷之數赴司  
找領實貯常平倉溢額穀三萬一千一十四石有奇



黔南詳志卷五  
社倉穀三千二百二十一石有奇又學租田額徵正米四千一十七石有奇又撥歸長寨完納耗米二千一百五十三石有奇本處產米頗豐民食所餘尚供隣封販糶各寨漢苗錯處通計一萬四千一十有三戶學額十二名武生如之建有雙明書院膏火田租穀一百一十六石駐劄平遠協分防千總一員外委一員兵丁九十名場市本城一鄉之大場十五小場六樹有桐蠟白楊刺楸木棉果則桃杏來禽石榴之屬產土布曰家機布唐家布境內無銅鉛礦廠亦無稅課州屬十三枝地方惟蒙楚公具隴草阿岔木

岡五枝皆狎家羅鬼等雜居此外更有蔡家青苗花苗獐猪共六種輸糧供役漸知禮義舊有康佐土司其人號狗耳龍家者依林莽爲居男子束髮不冠婦人辦髮螺結上指若狗耳衣班衣以五色藥珠爲飾貧者代以薏苡春時立木於野謂之鬼竿男女旋躍而擇配旣奔女黨以牛馬贖之方通媒妁死以杵擊臼和歌而哭移之幽巖秘而無識今土司已革僅有阿破土舍一員其俗漸化州一汛十塘驛曰安莊額馬五十四站夫一百名馬夫二十五名三岔河渡口一設有渡船上至郎岱下至普定爲滇黔通衢僻路



黑南詳明卷五  
六一  
三一通平遠一通長寨一通歸化大路三一通永甯  
一通郎岱一通省城

永甯州

永甯州在府治西一百四十里省城西三百里唐宋  
俱羅甸國地元初以打罕夷地置永甯州屬普定路  
大德中改屬湖廣行省至正中爲廣西泗城州所併  
明洪武十五年仍置永甯州屬普定軍民府三十五  
年府廢屬普定衛後僑治衛城正統三年置隸貴州  
布政使嘉靖十一年徙州治關索嶺守禦千戶所城  
萬歷三十年屬府

國朝因之順治十八年省關嶺所入焉設知州一學正  
一訓導一吏目一募役司巡檢一其境東至鎮甯州  
界五十三里西至興義府安南縣界三十里南至興  
義府貞豐州界二百二十里北至郎岱廳界四十里  
東南至貞豐州界二百二十里西南至安南縣界八  
十里東北至本府界八十里西北至郎岱廳界八十  
里廣八十三里袤一百九十里境內山川深阻林箐  
蒨翳扼黔蜀滇粵四省之要害咽喉重地也城周一  
里三分高一丈二尺甃以石設東西二門明時建城  
圍繞僅半里許高未及肩



國朝康熙間始更增築昔人稱州城爲植城以城內之頂箐山向多植樹故也二龍山在城東五里一名霧露山山半有雙洞二水分流雞公背山在城東四十里舊爲滇黔大道與關索嶺對峙下臨溪澗險峻難登明史諸王傳永明王由榔由安南衛走雲南順治十五年三月大兵三路入雲南李定國拒雞公背斷貴州道別將守七星關抵生界立營以牽蜀師卽其地也安籠箐山在城西募役司北山巒相接林木險翳周四十里舊爲入滇官道艱阻逾恒秋冬多霧昏曉不辨東北距關索嶺四十里靛山在募役司紅崖

山在城西北八十里懸崖萬仞惟東西一徑可登有洞廣數十丈傳武侯駐兵處上有諸葛營箭眉山在城北頂營司亘四十餘里河縈其下嶺有兩峯中甚寬平可耕藝撻罕坡在城北十里舊名達安坡方輿紀要元初州爲達安夷名撻罕郭子章黔記州初治撻罕寨宣德間改建於關索嶺所俗仍謂之撻罕州成化三年撻罕州土同知韋阿禮作亂調廣西泗城州土舍岑善忠勦平之卽此關索嶺在城西三十里明洪武二十一年置關索嶺雞公背二堡尋並雞公背入焉二十五年置關索嶺守禦千戶所建城於其



上門三城今猶存方輿紀要關索嶺明初用兵之地也太祖嘗諭傅友德云關索嶺非古道古道又在西北可以大軍蹂之開此道以接普定卽芒部渠長可盡獲也洪武十五年諭吳復等取關索嶺旣又勅曰若通關索嶺慎勿與蠻人戰於嶺上當分哨直擣其巢穴以掩襲之使彼各救其家不暇糾合以抗我師其旁土砦卽未能下合兵攻之無不克也旣而諸將果克關索嶺又取其旁土砦數十楊慎滇程記云雞公背與關索嶺相對兩山之趾界以溪澗嶺凡四十三盤至嶺有香樹坡小箐口坡白口東

籠箐坡

胡椒凹象鼻嶺左右皆崖箐萬仞中僅有道如梁行者慄且汗矣山半有馬跑井傳索統兵至此馬跑地出泉故名又有啞泉飲之能令人啞立石以戒行者距關嶺里許有妙明洞玲瓏幽邃道光七年學政許乃普泐黔南第一洞天六字於石聚仙洞在城南五里洞中窄小偃僂始入渡一小橋漸高爽頂有竅光明下注見有石牀石鐘水簾洞在城東八十里那大關四面懸崖洞內可容萬人畱節洞在城西南十餘里石上有字如蝌蚪不可辨識傳有劉節婦遇賊不屈死於此蜂洞在城西河營司洞深屈多水上皆懸



崖有蜂房大如車輪以春夏時來霜降前後去去早則歲歉去緩則歲稔刮蜜者恒從懸崖上縋而下如猿猱然觀音洞在城西北三十里洞中軒闢諸像畢具有白石若龜龍鱗甲蠕動乃積溜所成昔人勒字曰神龜玉液寂坐良久覺細雨暗泉從空灑落也伯牙洞在城北由北極觀溯流而上可以至其大江爲盤江源出威甯之可渡河流入粵者也白水河在城東北四十里由鎮甯州之西南奔注而來直落層崖與石相參疊爲三而後下長凡數十丈百步以外風雨橫飛瀑布之最大者也下有洞曰水簾昔孫可望

見水中有神物欲涸水以索之而潭水絕深厚期日不可竭乃止洞中有碑刻雪浪川霞四大字下流爲卽公河注於盤江又有者馬河卽者卜河在城西北六十里入盤江北口河在城東二十里亦注盤江落葉河在城東傳有潛龍人不敢漁灞陵河在城東三十五里梅子關在城西三十里舊有哨城盤江橋在城西三十里舊爲滇黔孔道設有驛兩山夾峙江流迅悍不可以舟明右叅政朱家民做瀾滄橋舊制治鐵爲絙長數百丈貫兩崖之石而懸之覆以板行旅如從枕席過尋毀



國朝順治十六年重修復圯於賊康熙二十三年重建  
乃益堅密橋之東歸州管理橋西由普安廳安南縣  
分管屆六年請領大修一次著爲令原設驛站今移  
毛口矣州境皆崇巒密箐嵐氣蒸鬱多雨少晴楊慎  
羅甸曲巒樹不凋葉蠻雲不放晴長亭望不見何處  
是楂城今水土較昔畧平尚餘瘴毒也關索廟在關  
嶺索爲蜀漢前將軍漢壽亭侯子從武侯南征有功  
土人祀之按蜀志壯繆二子長曰平次曰興平及於  
難興弱冠爲漢侍中有父風武侯甚愛之往討未嘗  
不與田雯黔書謂古者帥與率通意渡瀘之役興也

實從當時人以關帥稱之後遂訛率爲索耳王忠毅  
祠祀三等伯定海將軍四川提督贈太子少保諡忠  
毅王之鼎按之鼎以康熙十九年六月往援永甯逆  
賊吳世璠以九僞將軍之眾圍之三閱月糧盡援絕  
賊以火礮轟城城陷被執賊多方勸脅之鼎罵賊不  
屈遂遇害時康熙十九年九月二十九日也州之田  
畝皆依山傍澗高下畸零現在成熟田二萬八千九  
十九畝有奇額徵正米一千一百五十二石有奇正  
銀一千六百八十五兩有奇常平倉貯穀二萬五千  
五百二十五石有奇社倉十五共貯穀一千二百五



十一石有奇兵糧於秋米內支給學額八名嘉慶二  
十四年建有維風書院義學二一設本城一設關嶺  
膏火由州捐給所屬漢莊九處餘皆苗寨計大小三  
百九十寨城中舊設千總一員兵丁五十五名嘉慶  
二年改永安營爲協裁汰永甯汛千總新設守備一  
員把總一員外委一員額外一員又添兵七十名又  
裁汰關嶺汛把總一員新設千總一員外委一員舊  
設兵丁五十名新設兵丁九十名後裁去二十名新  
設募役汛千總一員兵七十名上坡貢原駐永安營  
把總一員兵五十名場市十一均以六日爲期地多

楓栗雜樹供苗民樵採之用無銅鉛礦廠稅口三額  
徵稅課銀一千二十九兩有奇稅羨銀一千四百四  
兩有奇苗有狃家蔡家花苗獐猪猓獾人六種狃  
家蔡家花苗獐猪各處俱有猓獾詳見大定猓人來  
自粵西居上下六馬江外衣尚青長不過膝祀槃瓠  
爲始祖勤於耕鑿不通漢語婚以猪牛爲聘視女姿  
色以定多寡亦用媒妁喪則立鬼竿屠牛會飲吹笙  
跳舞獨喪主不食肉土司原設四嘉慶二年省募役  
土司設巡檢一員此外舊設土司一員土舍共十  
名設十五塘汛有新舊二路由黃果樹歷坡貢而出



黔南識略卷五  
郎岱爲新路由黃果樹歷關嶺而出安南爲舊路皆  
赴滇通衢驛曰坡貢額馬站夫與他驛同

黔南識略卷五終



